



UJEDINJENE NACIJE

Međunarodni rezidualni mehanizam za krivične sudove

Međunarodni rezidualni mehanizam za krivične sudove (Mehanizam) osnovao je Savjet bezbjednosti Ujedinjenih nacija 22. decembra 2010. da nastavi nadležnosti, prava, obaveze i ključne funkcije Međunarodnog krivičnog suda za Ruandu (MKSR) i Međunarodnog krivičnog suda za bivšu Jugoslaviju (MKSJ) nakon okončanja njihovih mandata 2015., odnosno 2017. godine.

IZJAVA

TUŽILAC

(Isključivo za medije. Nije zvaničan dokument)

11. juli 2025.

30. godišnjica sjećanja na genocid u Srebrenici

11. juli 2025.

Govor Sergeja Brammertza, glavnog tužioca MKSJ-a i Mehanizma

Vaše Ekselencije, dame i gospodo,

Dragi preživjeli, majke i porodice,

Draga Munira,

Prije 30 godina, 8.000 muškaraca i dječaka iz Srebrenice bježalo je s ovog područja tražeći utočište. Ono što je nekada bila „sigurna zona“, to više nije bilo.

U danima koji su uslijedili, bili su progonjeni, zarobljeni, zlostavljani, mučeni i pogubljeni. Bio je to smišljeni zločinački pohod koji i danas potresa savjest cijelog svijeta.

Trideset godina kasnije, kako da im odamo počast? Odajemo im počast govoreći istinu. Ovo je bio genocid.

Da bi uništili narod Srebrenice, ti nevini muškarci i dječaci su ubijeni, dok je 30.000 žena, djevojčica, djece i starijih osoba protjerano iz svojih domova.

Genocid ovdje nije bio izolovan zločin. Nakon više od tri godine etničkog čišćenja, donesena je odluka da se uništi Srebrenica, da se uništi ono što je ostalo od bošnjačke zajednice.

Sudovi, međunarodna zajednica i historija nazivaju ono što se ovdje dogodilo pravim imenom – „Genocid u Srebrenici“.

Odajemo počast žrtvama i tako što imenujemo počinioce – poput Karadžića i Mladića. Ti okrutni ljudi zloupotrijebili su svoju moć i autoritet.

Njihova djela su donijela patnju ne samo njihovim žrtvama, već i cijelim zajednicama – uključujući i njihove vlastite.

Ali su izvedeni pred Međunarodni krivični sud za bivšu Jugoslaviju. I žrtve su, s ogromnom hrabrošću, svjedočile o njihovim zločinima.

Danas su osuđeni i zabilježeni u historiji kao jedni od najgorih ratnih zločinaca.



Da bismo odali počast žrtvama: moramo potvrditi istinu – što znači odbaciti one koji veličaju ratne zločince i negiraju genocid.

Moramo postići više pravde za žrtve – što znači prozvati one zemlje koje u tome ne uspijevaju. I moramo pronaći nestale.

Vrijeme je da se povratnici mogu vratiti i živjeti u svojim domovima u miru, bez straha, zlostavljanja i prijetnji. Ta mjesta moraju predstavljati mjesta pomirenje, a ne politiku prošlosti.

Na kraju, žrtvama odajemo počast tako što odajemo počast vama – preživjelima, Majkama i porodicama.

Već 30 godina vi se borite. Za priznanje. Za pravdu. Za obnovu. I uspjeli ste.

Zahvaljujući vama, Bošnjaci iz Srebrenice nisu uništeni. Vaša zajednica živi kroz novu generaciju, i živjet će kroz generacije koje dolaze.

I Srebrenica je postala simbol nade. Jer ste vi – uprkos svemu – nadjačali prošlost i pretvorili Srebrenicu u lekciju za budućnost.

Zato, na kraju, želim reći preživjelima, Majkama i porodicama: Vi ste heroji.

Vi ste čuvari istine.

Vi ste inspiracija svijetu.

Duboko smo dirnuti vašim primjerom. I na svima nama ovdje danas – na svima nama – je da budemo uz vas.

Da se borimo zajedno s vama.

Da se sjećamo s vama.

I da osiguramo da uspomene na vaše muževe, braću i sinove žive – u istini, pravdi i miru.

Hvala vam.

